

Proposta Lei Pesticida hetan aprovasaun iha finál globál

DILI, 10 Marsu 2026 (TATOLI)-Parlamentu Nasionál aprova iha finál globál proposta Lei númeru 21/VI(2a)-Pesticida ho votu unanimidade.

Iha deklarasaun votu, Xefe bankada Partidu Libertasaun Populár (PLP), Maria Angelina Sarmiento, hateten a favór ba lei ida-ne'e tanba importante tebes ba país, liuliu atu ajuda órgaun reguladór sira haree didi'ak distribuisaun pesticida sira ne'ebé barak iha rai-laran no laiha kontrolu.

“Ami husu ona atu providencia mós lista kona-ba pesticida sira ne'ebé tama iha kategória tolu ne'ebé identifika iha lei, hodi ajuda órgaun reguladora no beneficiáriu iha prosesu rejistu, kontrolu ba implementasaun pesticida ne'ebé atu uza iha ita-nia rai”, Angelina hato'o.

Antes ne'e, Presidente Komisaun Dne'ebé trata Asuntu Ekonomia no Dezenvolvimentu, Ricardo Baptista, husu ba Governu atu kria tan dekretu-lei ida hodi regula marka pesticida hotu ne'ebé utiliza iha Timor-Leste.

Tanba iha proposta lei ne'e ko'alia liu oinsá atu regula nia prosesu, produsaun, transportasaun, armazenamentu, merkadu no utilizaun. “Ko'alia kona-ba marka espesífika ne'e sei iha dekretu-lei ne'ebé parte Governu mak sei halo”, nia hateten.

Proposta lei ne'e apresenta husi Ministériu Agrikultura, Pekuária, Peska no Floresta (MAPPF) ho objetivu atu regula, iha territóriu nasional tomak, lisensiamentu, importasaun no esportasaun, produsaun, fa'an no distribuisaun, utilizaun, embalajen no soe pesticida sira, inklui pesticida agríkola sira, iha faze hotuhotu husi sira-nia siklu moris.

Jornalista: Nelson de Sousa Editora: Maria Auxiliadora